



Xalq so'zi

O'zbekiston —
kelajagi
buyuk
davlat

2025-YIL — ATROF-MUHITNI ASRASH VA "YASHIL" IQTISODIYOT YILI

1991-yil 1-yanvardan chiqa boshlagan

WWW.XS.UZ

E-mail: info@xs.uz

2025-yil 24-iyul, № 150 (9045)

Payshanba

Saytimizga o'tish uchun QR-kodini
telefoningiz orqali skaner qiling.



VATAN UCHUN, MILLAT UCHUN, XALQ UCHUN!

BYUDJET VA IJRO INTIZOMINI MUSTAHKAMLASH MASALALARI KO'RIB CHIQUILDI

Prezident Shavkat Mirziyoyev 23-iyul kuni Hisob palatasining faoliyati hamda ijro tizimini takomillashtirish chora-tadbirlariga oid taqdimot bilan tanishdi.

O'zbekiston Respublikasi Prezidentining 2024-yil 10-iyuldagi "Byudjet mablag'laridan foydalanish ustidan moliyaviy nazoratni kuchaytirish bo'yicha qo'shimcha chora-tadbirlar to'g'risida"gi Farmoniga muvofiq Hisob palatasining ish uslubi o'zgardi, uning vakolatlari kengaytirildi. Eskicha tekshiruvlardan voz kechilib, moliyaviy, muvofiqlik, samaradorlik va strategik audit tizimi joriy qilindi.

Endilikda bu palata faqat nazorat qiluvchi emas, balki byudjet intizomiga ko'maklashuvchi hamkor idoradir. Shu bois asosiy e'tibor moliyaviy intizom buzilishining oldini olish, buning omillarini tahlil qilishga qaratilmoqda.

Masalan, bu yil 6 oyda o'tkazilgan audit tadbirlari natijasida 5 trillion 600 milliard so'm samarasiz byudjet xarajatlari qisqartirilgan, byudjetga 5 trillion so'm qo'shimcha tushum imkoniyati aniqlangan.

Mamlakatimiz iqtisodiyoti izchil o'sib bormoqda. Bu, o'z navbatida, moliyaviy nazorat ko'lami va ish hajmini ham oshiradi. Buni qamrab olishning samarali yo'li — raqamlashtirish. Shu maqsadda "Masofaviy audit" axborot tizimi ishga tushirilgan. Hozirgacha u orqali 4 trillion so'mlik kamchiliklar bartaraf etilgan.

Taqdimotda endi tizimga sun'iy intellektni joriy qilib, kamchiliklarni keltirib chiqarayotgan omillarni bartaraf etish vazifasi qo'yildi.

O'tgan yili 12 ta vazirlikda moliyaviy nazorat bo'yicha tashkil qilingan situatsion markazlarning ko'rsatkichlari qayd etilib, bu tizim joriy yilda yana 10 ta vazirlik va idoraga kengaytirilishi belgilandi. Shu bilan birga, byudjet tashkilotlariga ichki audit va ichki nazorat tizimlarini takomillashtirib, Hisob palatasi bilan axborot almashuvini kuchaytirish bo'yicha topshiriq berildi.

Prezident Farmoniga asosan davlat auditi xalqaro standartlar darajasiga chiqarilmoqda. Hisob palatasi xodimlari bir yil davomida xalqaro auditorlar bilan birgalikda ishlab, tajriba to'pladi. Natijada tashqi qarz hisobidan bo'layotgan loyihalar xalqaro mezonlar asosida auditdan o'tkazilmoqda. Bunday tartibni loyihalarning ilk bosqichlaridan boshlash muhimligi ko'rsatib o'tildi.

Shu yil 16-iyun kuni islohotlar natijadorligi tahlili bo'yicha o'tkazilgan videoselektor yig'ilishida Hisob palatasiga "Xalq nazorati" platformasini barcha hududlarda yo'lga qo'yish topshirilgan edi. Taqdimotda mutasaddilar bu borada boshlangan ishlar va zarur chora-tadbirlar to'g'risida axborot berdi.

Bu tizim orqali qurilish, infratuzilma, kommunal xizmatlar, energiya ta'minoti, transport, yo'l, ekologiya kabi sohalaridagi muammolar bo'yicha xabar beriladi. Ularni hal qilish uchun portalga barcha vazirlik, idora va hokimliklar ulanadi.

Hozirgi kunda bu dasturni sun'iy intellekt asosida takomillashtirish, vertikal nazorat tizimini yo'lga qo'yish, koll-markazlar tashkil etish bo'yicha ishlar olib borilmoqda.

Davlatimiz rahbari mutasaddilarga ijro intizomini mustahkamlash, byudjet mablag'laridan maqsadli foydalanish va tejamkorlikni ta'minlash bo'yicha ko'rsatmalar berdi.

O'ZA.



Istiqlolni, ozod va obod hayot, adolatli jamiyat barpo etishdek ulug' imkoniyatni qo'lga kiritgan xalqimiz bugun taraqqiyotning yangi dovonlarini zabt qilish uchun hamjihatlikda dadil oldinga intilmoqda.

Dunyoda tinchlik-totuvlikka tahdidlar kuchaygan, ongu qalbga qaratilgan xurujlar makon va zamon chegaralarini tan olmayotgan hozirgi og'ir hamda murakkab bir davrda oldinga qo'yilgan marralar sari sobitqadamlik bilan intilish, bu yo'lda muayyan yutuqlarni qo'lga kiritish, to'g'risi, oson emas.

VATANIMIZ TARIXINING NURLI SAHIFALARI

Xalq deydi...

O'zbekiston esa Prezidentimiz Shavkat Mirziyoyevning qat'iy siyosiy irodasi, oqilligi, ulkan salohiyati, vatanparvarligi, xalqsevarligi tufayli yangi taraqqiyot bosqichiga ko'tarildi. Vatanimizning suratu siyratini yangilash, farovon hayot qurish, inson qadrini yuksaltirish, jamiyatda adolatni, qonun ustuvorligini ta'minlash, yoshlarning orzulari ro'yobi uchun shart-sharoitlar yaratish borasida asrlarga tatigulik muvaffaqiyatlarga erishilmoqda.

Zotan, davlatimiz rahbari ta'kidlaganidek, yangi O'zbekistonni barpo etish — bu shunchaki xohish-istak, subyektiv hodisa emas, balki tub tarixiy asoslarga ega bo'lgan, mamlakatimizdagi mavjud siyosiy-huquqiy, ijtimoiy-iqtisodiy, ma'naviy-ma'rifiy vaziyatning o'zi taqozo qilayotgan, xalqimizning asriy intilishlariga mos, uning milliy manfaatlariga to'la javob beradigan obyektiv zarurat.

Demak, maqsadimiz aniq, yo'limiz oydin. Ko'zlangan marralarga erishishimizda qat'iyat, kuch-salohiyat yetarli. Keyingi yillarda olib borilayotgan islohotlar, amalga

oshirilayotgan o'zgarishlar, erishilayotgan yutuqlar ana shunday deyishimizga, ishonchimizga asos bo'la oladi.

Shubhasiz, o'tayotgan har kunimiz — tarix kitobining bir sahifasi. Bugun xalqimiz ana shu shonli kitobning zarvaqlarini bezash, yangi mazmun bilan boyitishdek ulkan baxtga musharraf bo'lib turibdi. Zotan, buyuk shoir va mutafakkir Alisher Navoiy bobomiz:

Bu gulshan ichra yo'qdur baqo guliga sabot,

Ajab saodat erur qolsa yaxshilik bila ot, —

der ekan, har bir inson uchun o'zidan ezgu iz, yaxshi ot qoldirishi ulug' saodatligini ta'kidlaydi.

Ertayu kech izlanishdan to'xtamay, jonkuyarlik, matonat ko'rsatib mehnat qilayotgan insonlar, shaksizki, bugungi dorilamon kunlarning, nurli kelajakning bunyodkorlaridir.

Maxsus qo'shsahifamizda ana shu qaynoq jarayonlarning ishtirokchisi, zahmatkashlari, fidoyilari bo'lgan ayrim yurtdoshlarimizning dil so'zlari, fikr-mulohazalari gazetxonlarga taqdim etilmoqda.

2 va 3- sahifalarga qarang.



YANGI O'ZBEKISTONNING QIYOFASI

BU TINCHLIK, BARQARORLIK, OCHIQLIK VA INSON QADRIGA ASOSLANGAN TARAQQIYOTDIR

Yangi O'zbekistonning zamonaviy taraqqiyot yo'li xalqaro maydonda tobora ko'proq qiziqish uyg'otmoqda.

Xususan, erishilayotgan natijalar, O'zbekiston rahbariyati tomonidan olib borilayotgan o'z isbotini topgan ichki va tashqi siyosat tufayli mamlakatimizning

Dunyo nigohi

Ali BAKLAN,
turkiyalik investor,
O'zbekistonning Bursadagi faxriy
konsuli:

— Besh yildan beri O'zbekistonning Bursadagi faxriy konsuli sifatida ishlab kelaman. Bu vaqt mobaynida

bir necha bor mamlakatingizda bo'ldim. Va har gal O'zbekistonda naqadar jadal va barqaror ildamlab borayotganiga guvoh bo'lyapman. Eng asosiysi, ushbu taraqqiyot mamlakatning chekka hududlarida ham amalga oshmoqda.

modernizatsiya va islohotlar yo'lidan dadil odimlayotgani xorijiy ekspertlar diqqat markazida bo'lmoqda.

Xalqaro ekspertlar O'zbekiston tomonidan mintaq va jahonda boshlangan integratsiya jarayonlari, dolzarb global muammolarni hal etishda mamlakatimizning xalqaro maydondagi qat'iy pozitsiyasi haqida o'z fikrlarini faol o'rtoqlashmoqda.

So'nggi yillarda O'zbekistonda investorlar uchun katta imkoniyatlar taqdim etildi. Men Samarqand viloyatining Qo'shrabot tumanida qishloq xo'jaligi sohasiga investitsiya kiritdim.



137,5

trillion so'mlik qurilish ishlari bajarildi

Fakt va raqamlar

Yurtimizda 2025-yilning yanvar — iyun

oylarida jami **137 562,1 mlrd.**

so'mlik qurilish ishlari bajarilib, o'sish sur'ati

2024-yilning mos davridagiga nisbatan

10,7 foizni tashkil etdi.

Bunyodkorlik ishlari hajmining **52,1 foizi** kichik korxona va mikrofirmalar hissasiga to'g'ri kelib, o'tgan yilning mos davridagiga nisbatan

8,1 foiz o'sgani holda umumiy hajmi

71 647,3 mlrd. so'mga yetgan. Shuningdek, yirik

qurilish tashkilotlari tomonidan

30 771,7 mlrd. so'mlik, norasmiy sektorda

35 143,1 mlrd. so'mlik qurilish ishlari bajarilgan.

Yirik
qurilish tashkilotlari
tomonidan bajarilgan
ishlarning eng yuqori o'sish
sur'atlari Andijon,
Toshkent va Jizzax
viloyatlari
ulushiga
to'g'ri kelgan.

Qurilish ishlari iqtisodiy faoliyat turlari bo'yicha tahlil etilganda,

69 foizi bino va inshootlar, **20,9 foizi** fuqarolik obyektlari,

10,1 foizi esa ixtisoslashtirilgan qurilish ishlari yo'nalishiga to'g'ri keladi.

Jizzax tabiati fusunkor — bog' desa, bog'i, tog' desa, tog'i, ko'l desa, ko'li, cho'l desa, cho'li bor, Yaratgan o'z ne'matlari bilan siylagan, betakror, mamlakatimizning markaziy qismida joylashgan hudud. Biroq yaqin-yaqin gacha bu hudud haqida qo'pchilikda jengrax tasavvur yo'q edi. Jizzaxni shunchaki Samarqand bilan bog'laydigan manzil deb bilishardi. Yo'lovchi va transportlar o'tib-qaytadigan yo'l, juda oshib borsa, Baxmal o'lmasi, Mirzacho'l qovuni yoki Jizzax somsasi sotiladigan joy deb bilardi xolos. Bu bejiz emas. Ancha vaqtgacha Jizzax "o'z aravasini o'zi tortolmagan", dotatsiyadan boshi chiqmagan viloyat edi. Aytaylik, 2016-yilda viloyatning yalpi hududiy mahsuloti 7,7 trln. so'mni tashkil etgan. Davlatimiz rahbarining hududga har bir tashrifidan keyin ulkan yangilanishlar yuz berdi. 2024-yilda YAHM ko'rsatkichi 43,1 trln. so'mga yetdi. O'sish 6 baravarni

tashkil qildi. Avval Jizzax viloyatining sanoati, asosan, un, yog' va paxtadan iborat bo'lgan. Viloyat markazida barqaror ishlab turgan korxonalar sanoqli bo'lib, ulardan biri Jizzax akkumulyator zavodi edi. Qolganlarini esa ohak va sement ishlab chiqaradigan kichik-kichik xizmar tashkil etardi.

To'g'ri, hududda sanoat zonasi bor edi, biroq nomiga ishlardi, amalda huvullab yotardi. Sakkiz yilda Jizzax qishloq xo'jaligiga ixtisoslashtirilgan viloyatdan sanoati rivojlanayotgan hududga aylandi. O'zingiz aytin, bir paytlar Jizzaxda mashina ishlab chiqariladi desa, birov ishonarmidi? Yo'q, cho'lida avtomobil zavodi qurib bo'ladimi deyishardi. Holbuki, keyingi 8 yilda Jizzaxda avtomobilsozlik yo'lga qo'yildi. Qo'yilganda ham zamonaviy, elektr tokiga yuradigan, ekologik toza "BYD" avtomobillarini chiqarish boshlandi. Sanoat viloyatning deyarli barcha tumaniga kirib bordi.



